

四庫全書

集部

欽定四庫全書

集部

青城山人集卷一

詳校官檢討_臣羅國俊

中書_臣劉源溥覆勘

覆校官中書_臣田尹衡

校對官中書_臣嵇承志

謄錄_臣監生胡宗高

欽定四庫全書

集部六

青城山人集

別集類五 明

提要

臣等謹按青城山人集八卷明王燧撰燧字汝玉長洲人洪武中舉浙江鄉試以薦攝府學教授改應天訓導擢翰林五經博士官至春坊贊善洪熙初贈太子賓客謚文靖所著詩稿在當日已多散佚正統十二年其孫鏜

始裒次為編其端家華靖刪定為八卷即此
本也朱彞尊靜志居詩話稱其詩不費冥索
斤斤唐人之調吳人徐用理集永樂後詩家
三百三十人以燧歷卷今觀其詩音節色澤
皆力摹古格頗近於高棟林鴻一派誠有擬
議而不能變化之嫌然當元之季詩格靡麗
往往體近填詞燧能毅然以六代三唐為模
楷亦卓然特立之士又不得以後來王李之

派獎預繩明初人矣乾隆四十二年五月恭
校上

總纂官

臣

紀昀

臣

陸錫熊

臣

孫士毅

毅

總

校

官

臣

陸

費

墀

墀

青城山人集原序

余弱冠時已聞青城王先生刻厲於詩之名矣及遊京師獲拜先生於給事中天台蔣君所辱先生不以後生待余而與之進頃之蔣君以送宋侍書歸金華詩求於先生先生即伸卷濡墨題曰少小離鄉國歸時及壯年三巴百指住萬里一家全青瑣榮新秩金華復舊田聖恩何以報晚節保貞堅題竟即擲筆而去予時異先生於詩不涉構思才之敏句之新也有如此而不負昔之

所聞也矣茲吳門華君彙粹先生之詩凡若干卷欲命
工以缺於梓徵予序其首簡惟詩為文之至精者也發
乎情性而止乎禮義夫豈可易言者哉故知非賦稟清
明才趣超蹕之士不足以語此若先生者自少負聰明
特達之資才清趣潔宜其平日之詩之文輒與海內作
者齊驅而並駕間有或之而先者也若茲集不論虛寂
不流靡漫洋洋乎颯颯乎緣情指事駕蘓李而凌元白
其慨而不激直而不肆殊得詩人溫柔敦厚之旨誠不

負為一代之名家也茲辱華君之請序顧余之昏庸庸
陋奚足以當特念不拜先生者垂五十年餘因覩斯集
而感慨係之姑強言以弁其端者用識予景仰之私云
爾先生名璵字汝玉姑蘇人青城其號也官至右春坊
右贊善兼翰林院檢討贈太子賓客謚文靖華君名靖
字彥謀讀書惇行士也以先生沒而欲不沒先生之善將
刊是集以行於世亦可見其為人云故併序之景泰元
年八月初吉資善大夫南京吏部尚書蕭山魏驥書

欽定四庫全書

青城山人集卷一

明 王燧 撰

五言古詩

雜詩十首

昔年十四五猛志狹八荒欲登崑崙巔揮手攀扶桑腰
縣倚天劍身被拂雲裳出入在元始顧瞻近三光琅玕
久不寶靈鳥方高翔吞聲勿復道感慨熱衷腸

又

遠遊歷燕趙撫劍黃金臺昭王在何許遺跡空蒿萊是
時窮秋後朔漠悲風來驚沙掩白日六龍就西頽羈懷
無與歡俯仰獨徘徊徘徊將安之零淚曾沾懷

又

青陽降豐澤萬物競欣榮秋霜被原野從此悲凋零賢
人抱識鑑時運有衰興四皓隱商山二八登虞廷卷舒
貴適道奚必局常經

又

長川欲車騁脩路乃舟航
梧桐巢燕雀荆棘棲鸞鳳
人情多不測世故有難量
班姬不長信趙女入昭陽
微陰今日翳巧語使交傷
誰能如管鮑終始不相忘

又

多財情易淫縱欲神將鑠
瞻前慎圖返處泰當思約
婉嬖通衢子遨遊恣歡謔
玉佩綺羅衣白馬黃金絡
但慕千駟侈安知一瓢樂
一朝時忽殊萬事總零落
盛年不可保富貴難常托
胡彼沖虛人冥心守恬漠

又

薜花輝朝艷豈覩蟠桃春營營塵中徒寧識林下人聲
色令心惑驕荒使智昏日夕相馳逐何時返道真

又

顏回反天卒盜跖獲壽亡衆人惑其變志士守其常非
法不敢奸臨義安肯忘願為松柏姿不學桃李芳桃李
能娛人飄零使我傷

又

弱水不容涉蓬萊焉得遊生時被珠玉死後歸山邱一
身非我有此外定足求君子順時命小人行險謀榮華
能取辱貧賤可忘憂

又

盛衰互相倚物理本有常倉鷗方振羽鴻鴈已飛翔人
生不滿百微命若晨霜昨時朱顏子忽奄成蒼蒼材大
徒為累名高徒自傷何如王子晉乘鸞遠飄揚

又

東去有瀛洲靈鰲戴三峯洪濤九萬里雲海彷彿通神
仙息其上丹闕泊珠宮食霞幾玉蕊綠髮雙青瞳我將
從之遊輕舉凌長風飄飄八紘外流睇九垓中江河一
溝瀆泰華如蟻封放神蕩精魄壽與天地終

拙齋為徐希孟賦

抱甕良獨苦桔槔殊可珍何為漢陰叟不肯喪其淳古
道去云遠澆風盪天真營營趨巧智擾擾逐迷津之子
慕高尚游心葛天民閉門守質樸事此百年身繁榮媚

芳節百卉悴嚴晨人生有恒理安用常憂辛

萍居

匏瓜有恒繫流萍無定蹤物情各自然今古誰能通
人生寄宇內出處將無同墨生突不黔原思老蒿蓬仲尼
稱大聖轍跡環周封孟軻挾仁義鄒魯不能容宵人懷
所安君子順其逢行止雖殊塗至今歸一宗願子保貞
素坎流當任從

鳴鳳軒

鳳飛朝雲表五章脩羽儀廻翔久不下顧覽在德輝美人抱高志植此圭璫姿將期九苞翼來集凌寒枝但恐花不實零霜厲嚴威從今丹穴離惇惇抱長饑翻貽斥鷃誚中道將安歸

寄陳嗣初

昭代鮮遺逸夫人尚沉淪豈無乘時志華髮有慈親傾家具甘旨勵恭守清貧蹉跎四十載抱潔將終身嗟我愧非才叨陪侍從臣薦章豈所惜知子情未伸滄海風

霜晚故苑芳華新勉焉慎自保綵服高堂春

送徐希孟之沅湘

青青瑤樹枝忽帶風霜雪借問此何來沅湘久從役翻
思離別年寒暑屢遷易故交幾人存往事誰能識秋風
飄大荒旅鴈振新翼翩然整行旆又欲辭鄉國庭闈豈
不戀王事敢寧息嗟予久衰病送子傷衷臆匪無丈夫
志臨歧要難抑後會復何時勸子加食食

答王之常

金匱要略卷一
卷一
零露漙漙蔓草月華皓前墀美人在密邇枉劄寄遐思余
本林棲士夙懷山野姿矧茲抱病久筋力彌已衰慮淡
非有悟退閒固其宜念彼谷中蘭芳生日應滋過時不
以佩將與蕭艾萎非君同心者此志諒誰知

會飲賦得酒字

處世猶夢中夢覺復安有生前尚如此何暇計身後屈
原稱獨醒空葬江魚口古人不欲者一一今在否君看
枝上花榮悴若翻手朱顏幾何時倏爾成皓首畫堂綺

筵開總是青雲友海風掃秋空錯落掛星斗我將舞柘
枝君唱折楊柳勸君當此歡莫負盃中酒

送太守之官

瓦缶獲登薦洗壘寧見珍巴童更倡和豈復歌陽春吁
嗟去古遠大雅將誰陳聖朝復敦樸清風蕩囂塵多君
秉高志卓犖思超倫晚生際今世尚友懷古人亨衢縱
逸轡天池躍脩鱗分符守名郡治本歸清真香凝燕寢
畫吏散公庭春乃知汲長孺卧理淮南民孰云世日降

此道非殊倫勸君終努力垂輝映無垠

著存堂

高堂已寂寞居處若平生結念承歡日疑聞謦咳聲
况茲承祀事芳香既云升中心致愛慤洋洋儼居歆孰謂
逝者遠格思在精誠著存記戴禮端切孝子情

述懷

蚤年蔑知識負志頗傲岸每鄙子張辟常嫌仲由彥浩
氣逸虹蜺高情薄霄漢懸河吐狂談振綺洒芳翰辭胎

珠晶煥出璞玉瑣璫羣英見推獎前輩辱稱贊問齒方
在童有髮猶未冠展轉時物非蹉跎歲華換風霜忽淒
厲雨雪亦零亂未縱躍川鱗早鍛凌雲翰顧瞻之良圖
進退昧深算豺狼正縱橫虎豹共奔竄一身甘賤貧十
口寄叢灌蒸藜當晨炊掃葉供午爨角巾不裹頭破褐
僅遮骭世途日孔棘家道屢多難百憂遂紛紜萬事總
蕪漫浮蹤學萍漂浪迹類梗斷徒懷濟時略獨抱窮途
歎攜書過海濱負笈客江畔感至恒支頤愁來頻扼腕

今秋看又殘，茲夕坐將半。哀哀鵲遶枝，嗷嗷鴻失伴。青
燈乍明滅，皎月方輝煥。寒聲撼空窻，露氣逼虛幔。壯懷
凝欲消，歸思浩莫絆。驚魚怯舉網，傷鳥畏張彈。未覩黃
河清，空歌白石爛。亂杵遞相催，羣鷄互爭喚。出門望東
方，漫漫何時旦。

平安南詩

聖恩涵萬國，蠻夷犯天綱。寬刑冀或改，怙終彌弗臧。神
人咸憤怒，天兵臨南荒。虎賁八十萬，士馬皆精強。陸行

震山谷水涉騰海洋逆徒敢來拒一鼓如驅羊誰云富
良險坦若履康莊誰云連柵固易若摧枯楊脅從悉罔
治渠魁獨奔亡王師疾如飛追逐窮潛藏大索擣巢穴
如入無人鄉生擒盡遺類凱奏軍威揚遂令矢服表禾
黍秋芒芒昔陷狐狸窟今蒙帝澤滂父老饋簞壺士女
來元黃捷書報天下歡抃聲洋洋平淮美憲宗江漢贊
宣王小臣忝朝列稱頌進明光願言祈聖壽萬萬同天
長

王孟端寫竹木圖為院判劉士賓題

菁菁綠竹枝落落古貞木同抱凌寒安托根荒山曲長
安桃李花含芳媚春淑狂風一披拂蓬梗共吹逐願祈
保後凋寧憚委巖谷

行素軒

穀粟苟充腹膏粱非我謀禦寒有布褐奚用襲孤裘顏
生在陋巷簞食樂忘憂原思處蓬蒿結駟匪所求吁嗟
去古遠此道良悠悠之子秉夙尚潔躬企前脩力畊畝

畝間行素屏紛尤濁酒盈春缸時稼登寒疇營計有恒
產奉親足甘柔長年逢餘暇既唱還復酬內省多自得
外觀悉雲浮人生遊寰宇百歲非千秋咄彼利名子蚩
蚩何止休

送曾子固視猶子子榮還江右

邱園事韜晦托迹依蓬蒿棲遲四十載悉屏塵事交猶
子瑚璉器置身登青霄感念同氣恩心焉結煩勞翩然
辭林扉京華遠遊遨歡愛情既洽別離思已消因登鍾

山岑乃望長江潮時逢康泰盛治用神化超壯茲平生
志據此胸中豪薄言賦旋歸東流汴輕舸天邊三山迴
雲際九華高還家田廬靜去郭烟水遙豈無當世賢連
茹思拔茅卷舒各有道涇渭難溷清白駒終莫繫叢桂
那能招重來諒未卜仰止徒長謠

惠山留別諸友

名山蘊真氣地脉顯靈液澄源古石深乳竇寒泉滴
鏘鏘激清響湛湛凝沈碧中朝賜告還杖策遂登歷因尋

禪棲侶復值親知客芳蘭襲華裾嘉羞薦瑤席諸公屬
青年愧我髮垂白同逢聖明代歡樂殊未極明晨將戒
行分袂欲成戚後會良有期別離何足惜京華望東吳
雲樹纔咫尺

文會軒

我昔騁逸轡藝苑窮遨遊濟濟集時彥高談極殷周質
文相炳煥探索入元幽道漓秦漢際真源失其流聖代
復淳古唐虞共鴻猷諸生抱奇志聖學思探求開軒黌

宮裏師友更倡酬清風杏壇來沖襟散煩憂願言崇令德期與顏曾儔

養志堂

事親貴奉養匪在衣與餐輕甘或不憚麤糲有餘歡古來稱孝子豈為保饑寒賢哉曾參氏志養心已安孟軻表志行垂芳逾芝蘭之子慕前哲闢茲華構寬佳名題養志承顏恒闕觀邇來捧毛檄置身青雲端丁年富才力天路隨鵬搏天如阿閣鳳文彩脩羽翰顯庸自茲始行

見加纓冠忠貞克努力大孝乃思完垂輝著汗簡一寸
中心丹

結交行

堅冰不可履內蓄萬狀波小人不可近對面興網羅傾
舟非必深折輪非必栽君看平地間步步山與河

秋夜寄華東湖

旅泊未云久遽茲及良時郊原夕澄澈星斗上參差望
君密邇地結我千里思豈無澤畔舟泛月弄清漪徒然

起幽興尚愧文墨羈行待瑤華秀終當踐佳期援毫慚
鄙陋先用寫睽離

題徐希孟雲林卷兼東王之常

東吳山水郡我家萬山中自從別猿鶴振珮明光宮雲
林結遐想美人邈難從之子山中來都門忽相逢我家
南憲下幽蘭滋幾叢天寒露華墮花葉應丰茸路遠莫
能採恐隨蕭艾同送子鳳城外長江生西風明將卧雲
林五湖烟水東我有所思者同心復同宗懷之不可見

使我心中忉忉因君為報謝蕙帳非終空

徐山人來自東吳邂逅相見以雲林圖徵詩
追念舊遊為之悵然故人之常先生養高林
壑不渝素志自愧與時追隨進退無補可為
長歎也方將整冠入西清山人適來告別清
曉篝燈賦詩并識左方吳門王汝玉

挽林先生

林公生勝國卓犖志不羣蚤歲嘗膺仕老年遭世屯豺



虎相啖食龍蛇方未分三吳各都會白晝昏風塵樂土
成割據江山陷沈淪公時遂長遁閱迹潛荆榛不冠亦
不帶佯狂稱散人誓將沮溺儔甘與原憲貧違俗本全
節潔身非亂倫皇明靖六合萬國咸來賓伯夷洎呂望
歟然興海濱繫公豈無志彈冠乘道津奈茲筋力衰終
作草莽臣昔在八姓日翠華屢更新嗟嗟馮太師累世
秉國鈞何如鄭雲叟獨不掛纓紳觀公秉高誼異代同
清芬令子抱材器恭逢堯舜君蒼蒼示昭鑑公鬱從茲

伸鳳翔千仞儀豹變南山文終為明世瑞垂輝耀千春
九原或可作些酒招歌魂

初辭長洲縣庠

潛鱗貴幽沈迅翮當上征伊抱孱陋質俯仰難為情進
趨既匪任退武復懷驚念往感多變顧始愧將傾茲焉
幸返舊遊息在柴荆谷行晨晦曖嶺眺夕澄明紅泉演
綠礪碧磴披丹英時升烟霞表恍若凌長清素心自昭
曠外物徒紛榮願同戰勝者弄化保嘉貞

寄王秀才

無事互相倚孰能察其微羣賢溢天堦獨子偃巖扉雖
云缺華綬自顧有斑衣人生各異立志者當庶幾江山
入秋氣草木凋芳菲蒼然貞松質歲晚有餘輝

題雪屋卷

洛陽掩關臥剡曲放舟迴何如山館晝獨坐思悠哉鑑
湖似瀛海稽阜若蓬萊波淨銀為浦巖明玉作臺矜鮮
失舞鶴點白間踈梅知子豐肥藻詎讓兔園才願聞歌

郢曲陽春逐奏來

鵲鵲

遊鵲運四海黃鵠摩丹霄道逢霜霰嚴鏃翮青雲遙何
如秋原鵲短羽無高超饑食野田實棲集依葦蕭時飛
復時止和聲弄鮮飈雌雄各安偶所樂同鵲鵲志願易
為足過圖良自勞物生貴得性豈必搏扶搖

題雙壁堂

謝庭誇玉樹衛詩賦瑤璫何如臨江彥伯仲二難并瑩

然雙白壁皎皎藍田英佐邑初試用躬畊尚違榮昭代
貴良器天衢方大亨懷韞豈終久卑沈匪無成瑚璉薦
清廟琅玕貢明廷知君善待賈行見重連城

秋夜九首

桐風絃商聲竹露琤寒滴室幽月離離壁古蟲唧唧遲
莫行可企朱明奄成昔方來無新歡既逝多故感鼎鼎
憲下燈照我為生客

又

西陸氣淒惻敗扉宵不扃片月落空隙冷烟攢破櫺感
感少安卧悠悠孤抱醒悲蛩呻酸響老木挺瘦形即此
叢衆感懣然使心冥

又

憂聽不及遠客夢不暇長哀風吊中夜古葉啼高蒼幽
幽離下枝尚綴微薄芳嚴霜將卒至生意安所望失時
貴潛智揚已徒見傷君子識命分泯滅庸何妨

又

瘦骨懼寒集病懷驚運周迴愁緣腸轉孤緒隨噫抽念
昔苦多謬慙今未違尤流光逐逝水瞬息不暫留涉川
當乘舟遵岐當駕輶前修有良軌後輩宜勉由尚須策
其駕庶幾道可求

又

寒月如利戟稜稜不可干愁人如秋蟬喑喑皆哀酸新
淚迸故眼後噫續前歎誰言一寸心中有慮萬端

又

冷氣無暖卧短燭無長明志士有憤歎憂人多苦聲涼
月掛寒壁枯飈嘶商莖四時遞相促義馭長不寧

闕

忽如剪撫

闕

颯已盈竇蟲鳴幽幽餘生欲何成

又

四壁鬼神滿單棲誰與羣凝心無定寐集耳多虛聞病
骨利於刃瘠膚皺成紋盤盤愁輪運裊裊憂緒紛強為
咿嘸歌鳴響如悲蚊

又

羈貧日彌甚破屋秋夜長數點星掛帳五更霜落床寒
蜂刺雙足峭若櫻劍鏹枯泣不為滴憊噫總成章自憐
憔悴生安得逢春陽

又

露滴夕氣瘦風泣霜天枯暗螢無遠照商鳥有驚呼癯
肩聳將折吟腸痛如剗忍苦求古道古道非今途今途
與古道曲直各異趨趨曲不趨直傷哉古道蕪

為華彥謀題王孟端寫枯木竹石

洛陽二三月桃李爭芳菲朝隨春陽媚暮逐東風飛山
中有古木叢竹相因依蒼然抱貞固不為霜霰欺由來
君子心流俗那能移

題施江月扇

憶我初識君江軒月如秋故人丹林子挾我同遨遊涼
風起天末白蘋滿芳洲浩然縱奇氣畢竟情未收自茲
始相見談笑恒忘倦興來揮綵毫五氣雲露炫却哂謝
宣城澄江淨如練我去謁承明君來訪神京客樓三日雨

聽徹攔花聲別來今幾載屢看流光改彤庭賜告還風
景依然在重會落楓江芙蓉正堪採百年幾何時會少
多分離那知在今日聚首非素期玉盃行美酒座上皆
親知當筵不為樂莫待長相思明朝我仍去未必重相
遇丈夫志四方細故安足慮它時倘念我為折三花樹

題吏部陳侍郎奉萱堂

美人奉親處乃在湖山中水雲深幾許蒼翠千萬重高
堂啓華構長日春融融羅帷卷晴旭綵服翻和風稱觴

介眉壽花暎親顏紅人生天地間至樂誰能同願言保
終養何必希喬洪

鄒氏安然堂

君子安命分宵人蹈危機二者茫昧間孰能察其微陸
行思薄漢沈淵欲騰飛何如順其軌履此坦且夷賢哉
道鄉裔素位不外馳文繡與絺綌各言守其宜我歌安
分篇願以貽箴規

題廬山讀書處卷

謫仙去已久千古廬山空
唯留瀑布水依舊懸長虹
美人抱良質價重連城璧
心同秋水清氣與晴雲逸
結屋廬山邊讀書知幾年
逍遙明月下嘯咏涼風前
長吟謫仙詩還繼謫仙興
五老削青天芙蓉插明鏡
揭來從宦遊空憶廬山秋
九江可攬結飛夢過江州

黃鵠山房為典儀蕭彥敬賦

黃鵠已飛去空餘黃鵠山
只今幾十載黃鵠當來還
美人雲霄士托跡茲山裏
山房卧白雲丹詔忽徵起
典儀

侍親王朱郎叅鵠行自公每退食山中恣翱翔天空月
明後涼意滿窻牖風生萬壑哀黃鵠知來否狂歌招黃
鵠却上黃鶴樓長江一萬里流到武昌秋仙人子安輩
玉節降瑤臺不騎黃鶴下定跨黃鵠來我將從子去附
翼紫清表追隨黃鵠遊俯瞰三山小

為顧御史題竹林茅舍圖

簪紱遂初衣結茅在深竹庭靜積秋陰窻虛鎖寒綠知
子久樂閒無心慕榮祿予本林壑人平生寡羈束欲因

風雪夕來擬聯床宿為問捧簡時何如此幽獨

愛日堂

羲和不停馭孝子多隱憂譬彼川上波逝者無廻流寸
草徒有心春暉諒難酬豺獮欲思報昊天極悠悠誰揮
魯陽戈為請飛光留

為談彥誠題戴嵩畫牛

楊柳綠生陰春陂芳草深牧童放犢去杏塢入烟林黃
昏伴應少孤月起遙岑嗟我忘歸客徒興畎畝心

題侯主簿忠告軒

君誠不獨治分憂賴賢牧所以漢郎官出宰應星宿長
洲古名邑民物稱富足年來久凋弊五月耀新穀侯令
勅煩才存心在忠告行春載輕車烟村桑柘綠孝悌申
古訓淳龐化今俗坐令百里間謳歌仍鼓腹昔聞宓子
賤彈琴致民服復修良吏傳為爾請重續

霞洲舊隱

我聞仙霞景未識仙霞洲三山橫紫翠影落七閩秋前

賢讀書處占盡仙霞趣結綺排空來流暉浮野去之子
非庸人霞洲卧幾春竭來應明詔侍從依紫宸徒凝霞
洲想難遂霞洲賞會待功成時拂衣許長往

題靜專齋

天道玄以穆生物無二心陰陽不停機寒暑遞相尋默
然成運化寧間古與今惟人最鍾秀靈臺湛沈沈操存
諒有道不為羣累侵澄瀾來輕風皎月銷微陰勉焉勿
休替接武淵與參仰希無言訓三歎有遺音

題養晦齋

良玉蘊貞石明珠藏重泉未登卞隋場至寶何由宣美人抱才器中歲甘自捐法曹纔小試不與物推遷簿書日糾紛此心每悠然金門慕方朔山陰憶梅仙由來貞隱者豈必棲雲烟乃知抗志士匪謝區中緣願子終所守兼以道自全

題高太常贈錢文學畫竹

美人抱貞節來自茗溪陰相遇玉堂仙貽贈比兼金猗

彼綠竹枝琅然瑤華音微物豈足貴用表歲寒心

題清暉樓

昔上越王城曾望丹山曲千巖與萬壑一一皆經目
歸來四十年東望心茫然至今山窻夢夜落九洞天葉君
住東州家有清暉樓檐棲水色冷簾卷山光秋緬懷舊
遊處天涯渺烟樹長吟謝公詩安得凌風去

遠趣樓

王君大隱徒脫畧當世務結樓紅塵中宛有滄洲趣窻

含夫椒雲簾卷洞庭雨暮看烟鳥還朝見風帆舉身將
杳漠俱心與鴻濛侶即此是真遊何須在巖渚

題畫

嘉樹生繁陰林虛轉深杳夜來疎雨收綠水人家曉素
心寡所營豈為煩慮擾獨坐望南湖清風動蘋杪

又

疎烟帶平野閒花落空林鷄聲在何許人家春樹陰將
尋邱仲侶諧此塵外心幽期倘云遂寧惜露沾襟

松石軒

熙陽麗東園繁華艷桃李驚風飄西陸零落委流水驅
車駕言邁登彼南山趾青松何鬱鬱白石亦齒齒亭然
獨後凋屹立復奚倚狂夫徇輕薄志士固終始願期保
貞心中道無衰靡

題張昭陽秋野軒

玄象無停轡白駒恒不羈旋聞金飈振奄觀炎暑移堂
居瞰西野秋氣修云淒鳴鴻方噉噉彼黍漸離離白蘋

芳華動紅蘭彩艷滋彈冠晴崗表濯纓晴川湄物情信
多美夙心寧弗怡但感幽風戒重懷蟋蟀詩履霜非伊
始堅冰行可期四時有成序天道諒如斯達人貴無悶
志士抱遐思唯應守其素茲理良可持

題玄中子卷

君平昔遁世賣卜居城闔百錢足自給閉門守清真伊
人負高志脫畧烟塵際清風去不還此道今誰繼我聞
春市東客有號玄中早年謝紛靡晚節甘固窮嘗師玄

中子曾晤窮通理龍性豈能馴鳳飛疇得制我願往從
之平生命自知不須論躍馬但欲問前非

哀解開先

勝國運終圯潢池爭弄兵惟公起儒素志在安蒼生風
塵昧寰宇攬轡思澄清誓將雙龍劍截海屠長鯨西江
數十郡寇盜紛縱橫公時奉朝命慷慨辭帝京翩然乘
單舸萬里東南行父老覩漢儀簞壺欣并迎間出敵人
壁重完吉安城檄書傳將臣戮力掃撓搶當時忠義徒

猛氣衝冠纓指期定恢復奮激爭攄誠惜哉事已去雄
圖竟無成狂瀾既潰決孤柱安能撐徒揮魯陽戈難挽
落日傾至今悲歌士聞風為吞聲魯連遊邯鄲片言定
紛爭謝傳起東山談笑江左寧嗟公雖不偶千古同高
情可憐流俗子錙銖論重輕安知壯夫節成敗何足評
余亦抱奇偉囊錐常願呈慕公一寸心金石同堅貞布
衣憂社稷任重居公卿九原不復作長些哀難平賦詩
繼七哀雪汨風悲鳴

和僧見寄三首

師本林臥人予亦烟棲客同在一山中如何未相識鐘
鳴松杪風惆悵生孤憶

鶴飛空林表人語驚泉間清景方自悅所思杳難攀歸
雲何處至無復望中山

聞說真心處巖棲知幾層磬隨夕籟斷香帶秋嵐凝寂
寂松窻下孤燈照一僧

二婦艷二首

大婦冠鳳翹中婦試春綃小婦方安卧羅帳掩春嬌曙
寒衾枕冷良人事早朝

大婦上雲機中婦裁羅衣小婦多姿態含笑惜春暉烏
啼花復落夜遙人未歸

詠中庭幽蘭寄曾日彰練聲伯

中庭有幽蘭貞獨信為美移根自澤陰托蔭近堂趾敷
葉恒披綠抽莖復攢紫桃李詎能方荇蔭或可比紉之
佩服間足以贈君子

送浦舍人還晉府

秋氣集西陸，驚風飄大荒。
酒酣拔長劍，送子度太行。
賢王受睿算，闕土鎮朔方。
晉國古名都，九州輳才良。
子懷珠與璧，獲登隋下場。
置身既得所，勲業行可望。
別離當茲日，豈不懷感傷。
丈夫相結托，所貴在慨慷。
詎學兒女徒，眷戀涕沾裳。

送同年故人別

孟春寒律逝，令節變青陽。
結軫東郊路，餞子返故鄉。
山

川固云邇感別易情傷念昔同遊日騫翰志遠翔詎知
今再遇流浪歎星霜時風敷淑氣皋蘭茁蕝芳採此將
為贈終要去不忘

送吳得清寺丞復任

之子出將家能武兼能文昂然騏驎姿不與凡馬羣我
昔始相遇芝蘭喜同芬匆匆情未盡遽作東西分愧我
忝宗伯幸際唐虞君子行典馬政目極滁陽雲京華素
秋節邇迨展殷勤羨子氣清逸涼空淨塵氛丹青凌顧

陸詩逼鮑參軍或時洒翰墨縱橫題練裙飄然復別去
幽路滄江濱愛而不可挽烟樹愁紛紛贈子芳杜蘅懷
袖有餘薰願子保貞潔皋鶴聲終聞

發故篋得表姪元允所錄雜文

我有心所親全家竄南徼傳聞已淪亡想念結懷抱開
篋睹遺書臨編增永悼伊子自童外與爾敦情好自匪
因親暱由來同志操泮宮武共步蘭省藝偕較宇宙中
橫潰艱虞出非料爾去困纍拘余歸隱畊釣一朝異存

沒萬里阻哀弔荒阡瘞旅櫬炎風拂飛旒二親亦沈隕
孤息復誰告感茲痛心膺奚暇論墨妙殺羞莫安設鞠
養言非蹈摘章情冀申濡毫意如耄

秋齋曉坐

旭旦抱虛寂齋居絕諠譁淡然思慮息悅此景氣佳涼
颼散煩燠綠樹含清華茲焉即棲屏奚用窮幽遐羽人
漱金液隱者營丹砂長生事既悖遺世言徒誇我志孰
能亮沈吟空自嗟

清樂軒

雅志厭紛擾
委懷泉石間
雲嵐遞掩映
松竹交迴環
坐覽架上書
仰瞻天際山
諸生列華席
辨析啓心顏
此中有真趣
非謂耽燕閒

荅丁遜學虞公務見寄

前峰暝色起
四野黯將暮
緬懷故山人
相望阻歡晤
感懷抱離愁
沖沖動憂素
豈無江上舟
泛此烟中渚
尚為文墨繫
未果歸路載
歌投贈篇
惆悵徒延佇

又

偶然返山中相見散煩襟別來又旬日佳期尚難尋郊
原初雨歇新綠遍春林自慚萍梗迹徒負烟霞心覽君
枉貽什中有金玉音沈吟不能答落日下西岑

湖中夜泛

夜深入廣澤月暎孤舟寒四顧杳無際益知天宇寬孟
冬氣蕭索北風振枯萑烝然遵渚鴈驚舉青雲端嗷
嗷發哀響音無地息羽翰我心懷惻隱感激生憂患願言

金史卷八十二
溥愛惠威使茲類安惜哉力微弱扼腕徒長歎

送徐庭蘭歸包山

君家洞庭西我家洞庭東盈盈一水隔何事不相逢
花飛長安陌邂逅初相識一見即成懽寧知共為客
秋風生旅衣別我欲言歸無限滄洲趣吳山入望微
因君問猿鶴蕙帳何如昨別有歲寒期長歌在林壑

秋夜懷沈秀才

螢棲衰葦寒月斂踈蘿暝羈懷悄無懽臥背風燈影露

冷葉聲翻更深人語定欲彈孤桐琴惆悵誰能聽因茲
念知已展轉至宵竟

題仙山圖

二室秀猷烟九華挿青天仙人跨白鳳棲息來其巔我
欲往從之跪受長生編飄然學輕舉謝此塵中緣平生
事遨遊空悞桃李年秋霜點綠鬢未果求真詮空齋看
圖畫靈境臨我前雲梯掛蒼巖碧澗流丹泉金光草初
長瑤華共芊綿何當食其英笑拍洪崖肩

次汪翰林登尹山述懷效韓儀曹詩韻

朱火流天未商飈起江皋佳人在何許
一夕增波濤相望阻遐道無由泛輕舫
烟空數鴈過木落羣峯高感茲歲將晚
使我心煩勞徒然植蘭茝乃爾埋榛蒿
清風既不至霜霰將焉逃賦詩謝妍倡
兼以呈同曹

題度關圖

秦川西南驚迢遞帶函關鷄鳴津吏起
車馬無時閒七賢欲何之騶從擁征鞍
顧盼周鄭郊翱翔二清間茫茫

快遐目悠悠開心顏而我苦匏繫徒思遠遊盤披圖企
高躅飛度鍾華山題詩攄壯懷安得相追攀

次翰林博士先生歲除陪祀詩韻

文武創王業成康紹鴻基謳歌協人望歷數承天時聖
朝啓景運太祖英雄姿九州昔橫潰伊誰撫羣師龍飛
起濠泗叱咤開坤維戎衣纔一試中夏先平夷觀兵出
日表振旅陰山陲鰥寡有安養困窮無垂洩北征南服
怨東討西人思嗣皇御大寶發政首老羸諒陰始終畢

南面裳衣垂三千舉禮典五百符貞期聖心不自滿夙
夜惟敬祇獻歲脩時祭致齋肅威儀鳴鑾屆清廟侍衛
行逶遲雲從翔鳳蓋日炫交龍旗音容端可即登降愀含
悲載惟肇造艱慎守方自茲精心益寅畏對越罔愆遺神
保錫靈貺宗祝告蕃祺萬邦永康乂屢豐無阻饑一德恒
昭顯日新寧類疵泰山奠宗社瓜瓞綿根支商王配齊
聖周后同緝熙億年固統緒百代奉宗祠史官紀成績
足配生民詩

送劉廣文

美人冠章甫千里遠徂征
餞別河梁上惻愴結深情
江南後袂罷春服屬初成
芳洲生綠水繁樹隕朱英
草蔓繁如綬鶯歌響似笙
念此將暝間中素詎能平
惟應候迅翼仰聆金玉聲

雜詩

世代宅三輔遨遊遍南都
南都繁華地鬱鬱帝王居
朱宮夾馳道丹闕俯清渠
東眺金張第西瞻許史廬
南鄰

擊鐘鼓北里鳴匏芋平明朝謁散憶蓋溢亨衢日夕未能止鷄鳴復來趨貪夫徇財賄烈士貴名譽令我諒何苦坎壈獨憂虞

題方士洪雲林書舍卷

我家吳山西君家吳山東東西近相對各在雲林中別來忽幾載屢見流光改佳遊今已非往事知安在君浮汭河水我客京華春同沾金陵酒共是殊鄉人我猶滯冷舍君將還故山雲林結遐想可望不可攀送君長安


道飛花亂烟草楚樹接吳山關河路非杳明朝我憶
君矯首情易悽雲林在何許如隔武陵谿

顧慎畫為徐子信題

放舟白蘋渚上有青楓林美人自遠至水濶煙雲深相
看默無語共愛風滿襟俯仰千載上何人是同心

又

林間綠綺琴江上木蘭艇同是塵外人迹殊心各靜葉
下羣樹涼雲歸萬山暝物我俱已忘清襟豈勞整



青城山人集卷一

欽定四庫全書

集部

青城山人集卷二

詳校官檢討

臣羅國俊

中書臣劉源溥覆勘

覆校官中書臣田尹衡

校對官中書臣嵇承志

謄錄監生臣胡宗高

欽定四庫全書

青城山人集卷二

明 王燧 撰

七言古詩

送鄭玄齡還家

山中別來三十年京華重見情依然昔時少小今老大
相顧握手俱堪憐緬想烟霞同志客楚雲秦樹天南北
憑誰為問舊遊懽鷗盟冷落花狼籍雨聲空館喜聯床
銀燭搖紅夜正長解貂且醉金陵酒勿論它鄉與故鄉

我方留滯君歸去未擬佳期在何處百年幾度海生桑
目斷江東縟離緒

題王叔明畫黃鶴山圖為喻彥行賦

我昔曾遊黃鶴山山人留我閉松關山中風雨經十日
萬壑千巖空翠間別來浪迹遊湖海歲月茫茫不相待
回首東南頻夢飛山空鶴去人何在畫裏依稀記往年
水光山色挹依然尋遊常有山中客揮手誰招鶴上仙
竹陰深鎖秋窻曙疑是山人吟笑處人生行樂付東流

萬事浮雲撻何許我欲山中訪舊遊
酒船橫渡洞庭秋
請歌黃鶴歸來曲消盡胸中萬古愁

題海棠白頭公為范原紹作

韶光染色濃如綺開遍東風枝上蕊
海棠偏得艷陽多
亂簇香紅嬌不起白頭啼鳥含芳情
殷勤飛入花間鳴
似向東君訴心事千回萬轉皆春聲
餘情欲寄朱顏客
為報青春勸君惜看花須及少年時
莫待吳霜鏡中白
為朱昂題薛澹園竹

金部四八
卷二
我家昔住吳山麓，遶屋曾栽萬竿竹。如今見畫却題詩，
憶在山中春雨時。暮雲作團飛不起，空翠滿衣秋欲洗。
何當重掃石床眠，一任露華涼似水。

題湖山佳趣卷

我生夙抱烟霞癖，半世林泉寄蹤跡。五湖春水洞庭山，
沙鳥野猿俱舊識。菲才叨祿在京華，頻看長安陌上花。
翻憶湖山昔遊處，不知明月落誰家。美人家在東吳住，
占得湖山無限趣。採樵常倚桂枝巖，放棹時過荻花渚。

我有茅堂與秫田歸期未卜是何年玉堂一枕春風夢
飛遶山光水影邊

新秋寄遠

梧桐露零金井寒芙蓉水減銀塘寬社日湘簾送雙燕
素塵寶扇愁孤鸞新絲織就鴛鴦綺并刀裁作合歡被
古巖桂吐月半輪澄空鴈來人萬里星斗迢迢涼夜長
音書幾日到遼陽封侯早繫黃金印莫負君家白玉堂

石湖送別

青山嵯峨雲外起下有澄湖綿十里春風吹雨洗吳天
天淨湖明玉鏡圓范公昔日曾遊處水色山光帶烟樹
春明畫舫載笙歌獨有遊人自來去美人從此赴京師
湖上楊花正亂飛歌罷湖山前度曲珮聲歸去侍彤闥

房山竹

輞川昔畫鐵鉤鎖滿幅縱橫鳳毛墮澄心初畫金錯刀
烟梢數葉風蕭蕭房山挺出文蘇後近代誰能出其右
綵毫揮成玉兩枝弄晴帶雨青猗猗此君真得寫神手

宛然空谷相逢時
吳興洒瀚飛霜雪
名畫名書稱二絕
風流一代屬儒家
什襲珍藏宜檢閱

題張良之思親堂

二親昔時在庭闈
孝子翩翩舞綵衣
二親已歿歸黃土
孝子空思綵衣舞
春風花開秋葉黃
雨露既濡天降霜
流光無情不相待
此心思親那可忘
當年種得長生草
惆悵如今亦枯槁
滄溟易竭山可虧
人生思親無絕期

讀余忠宣公文集

中原日落秋塵黃西望烽火連荆襄雄藩宿將盡驚遁
書生復見張睢陽孤軍堅壁大江上誓欲保障東南疆
羽書四入丞相府援兵不出吁可傷神州陸沈大勢去
夫誰擊楫江中央七年大小數百戰士卒感發疲復張
食殫力竭城遂陷麾下裨將無生降嗟公竟作厲鬼死全
家義徇為國殤至今遺文落人世直與日月爭輝光伊
余再拜獲披誦徒技血淚沾衣裳九原精爽應可作願
歌大招薦椒漿

金陵夜坐

海風夜半從東起，雲卷秋空淨如洗。
三山射影入明河，金作蓮花開綠水。
綠水茫茫使我愁，不知何處可通舟。
張騫一去今安在，天上人間幾度秋。

題可齋卷

維揚佳士潤州客，十載簪纓遊上國。
齋居新構遠塵囂，彤邸扁題留翰墨。
縹帙牙籤左右陳，青囊有藥濟時人。
年來積得陰功厚，紅杏花開遶舍春。
長時賓友多相過，

透竹茶烟翠成朵機心總付與浮雲觴咏笑談無不可
老我年來衆疾嬰願求七劑制頽齡朱顏若有還童望
不用黃庭內景經

贈解學士

憶昔先皇臨紫極軺車屢降徵山澤君時年少挾奇才
徒步觀光來上國萬言策進蓬萊宮劔花出匣森詞鋒
九重非常賜顏色一朝聲譽凌長虹玉堂初秉絲綸筆
金豸俄遷烏府秩廷臣俊乂數千人當代諫書推第一

殿前端立近宸旒西風鵬鴉橫清秋片言直折田丞相
幾度請斬安昌侯貴戚勲臣金與霍終年陪從親帷幄
長安市上多家奴一日聞風皆膽落天恩旋許歸寧親
放迹西江山水濱長讀南陔采蘭句繡衣晴炫斑衣新
陽春明月秋風夜憶遙鵷行侍龍駕中天回首五雲高
清夢長飛雙闕下禹湖白日歎龍昇君亦倉皇西北行
孤臣遙望帝鄉遠血淚如雨沾長纓萬里棲棲復歸日
弊裘羸馬無人識立都觀裏看桃花總是劉郎後來植

我皇繼統傳萬年囊括四海收英賢賈生遂膺宣室召
諸葛不顧南陽田舍香重入鑾坡直屢草丹書宣帝德
金鷄銜出紫泥書蓮炬照還青瑣夕先皇盛業超虞唐
命君紀述開秘藏編成再拜獻中禁勅賜文綺兼緋黃
萬機燕閒宮漏夕東閣西清常侍側恭承顧問進嘉謨
上補衮衣無闕職明良際合古今稀況復兩朝蒙眷知
子房一遇赤龍子倒海傾心山不移嗟余識君雖恨晚
君常顧我多青眼大夫傾蓋即情親結交何必論深淺

勸君松柏勵貞心歲晚不為霜霰侵
投軀盡悴報明主
袖拂五湖烟水深

薛濤海棠

錦城已得春消息萬里橋邊花似織
東風先到海棠枝
千朵芭香茜裙拆橋邊嫩人花作魂
玉纖巧奪花精神
娟娟盡濕金莖露却笑顰脂點絳唇
鸞殘半幅情無限
不學琴心抱孤怨只愁化作綵雲飛
綠葉陰陰閨深院

半野軒

松陵城外長橋路綠水逶迤帶雲樹水邊樹裏是誰家
半郭半村高隱處少年曾入幽并遊投老還家理釣舟
醉臥蘆花深浦月笑呼笙鶴洞庭秋流光苒苒浮雲改
八表神遊知幾載至今想見晉風流猶有當時遺墨在
我亦烟波舊釣徒香秬炊熟膾鮮鱸天恩未報丹心切
敢問漁蓑泛五湖

題岳陽樓圖

君山一帶橫黛蛾洞庭萬頃生白波西風落木楚天迴

樓倚紫漢高嵯峨西瞻雪嶺雲中起東俯長江數千里
飛簷曲欄倚西風落鶯孤霞帶流水昔聞蓬萊有真仙
幾度樓頭曾醉眠玉管一聲山月白朗吟飛去已千年
予生素有遨遊志白髮東南欲留滯登樓擬欲覓仙蹤
試問三神山外事便當鍊液鎔金丹後天不老常紅顏
晴窻對畫發遐想岳陽之樓何日來躋攀

冷齋

單君家本東州住十載栖栖守儒素一官新領廣文旆

宛在長江最西處江花江水朝暮流却望家鄉思舊遊
想像當時讀書處齋居蕭颯冷如秋自從來作江西客
留得平生心不易一齋况味冷如初任使人間自炎赫
歲云暮矣飛嚴霜東園豈復遺芬芳貞松老栢挺孤操
蔚然秀發千尋岡人生抱道貴如此肯逐繁英共浮靡
世上誰知鄭廣文洛陽豈識袁高士嗟予避熱三十年
冷齋寒席心久便人生老去本戒得况乃層冰心素堅
感君少壯負奇志凡馬羣中見騏驥願君中道勿自疑

晚節苦貞宜愈勵

題鳳山書屋

吳山往事浮雲去山勢猶傳鳳棲處東風不鎖玉樓春
花落當時後庭樹美人家住鳳山坳雪卷橫江萬頃潮
雲氣陰連三島近海門晴拔兩峯高踈簾展卷清朝坐
曲几篝燈宵未臥鳳飛千仞不歸來頻見萬松山月墮
九苞覽德今朝天美人追隨青雲邊黃旗紫蓋蔥龍起
彩章五色同翩翩置身阿閣依霄漢珠樹璫花互輝煥

親聽簫韶奏九成。嗷嗷聲在瑤臺畔。應思高臥鳳山雲。
水影林光幾度新。野鳥獨憐山寂寞。一聲啼斷翠華春。
別來書舍渾如舊。芳草閒花自增秀。已聞名譽重穿楊。
未許思家問垂柳。風流白皙方青年。駿馬金羈被錦韉。
丹鳳城中朝謁下。何人不羨玉堂仙。况嘗遠作乘軺使。
西北山川歸攬轡。未誇天上泛靈槎。盡入胷中作奇氣。
憶余少覓錢塘遊。月中折桂西風秋。可憐與子未相識。
不向鳳山尋少留。老來遇子芙蓉闕。屈指流光十餘閱。

瑣闥應制午陰移紫禁候朝清漏徹同侍鑾輿幸辟雍
千官珂珮如雲從退歸一望春無限滿袖天香紫陌風
講筵初設紳纓列延閣編書萃才傑就中我最知子深
楚楚真離產丹穴西蜀徒稱龐士元河東不用推三絕
絲繩玉缸春酒香幾回共醉黃金觴華筵錯落羅綺食星
河銀燭交榮煌後予簪筆承華侍子錄勲績書旂常玉墀
同造鵷鷺序東閣西清嚴禁籞此際終朝迹稍踈每逢
休暇多相與我今為子歌鳳山興落書窻綠蘿雨劍花出

匣秋蓮開看子爽邁非凡才育成羽儀脩炳蔚當年本
自岐山來明堂大啓臨泰階聖人端拱萬國懷銜書呈
祥將屬誰鳳山舊舍何有哉

聚玉堂詩

連城白壁天下奇卞和得之翻見疑周家弘璧及琬琰
列陳西序誰能窺何如春秋邾國多一門長幼春雍熙
風雲清淑華構啓九龍山前震澤湄春花秋月歲頻度
堂上日日吹塤簫伯兄資稟溫且栗仲季咸粹無瑕玼

呂君舊為文學掾揭題聚玉顏堂楣河南先生玉堂老
文章燁耀長虹垂雄篇奧義作題識力挽古道孰澆漓
容臺博士梁溪彥持卷索我為歌詩硜硜頑礦人所棄
敢對西子揚蛾眉勉思祖母尤氏族事宋穆陵為太師
昔營菟裘並錫麓少小猶憶相追隨邑中著姓我多識
鄒氏頗亦曾相知青氈傳家將百載不逐桑海同更移
秋風萬木總凋謝挺然獨抱凌霜姿只今相承凡幾葉
庭前皎皎增璫枝緬懷時風久趨薄欲咏棠棣嗟吾衰

喜君與俗不俱靡二難皓髮全怡怡有如紛紛鷄鶩侶
蔚然孤鳳丹山儀余家昔嘗秉友愛鄉人曾以芝蘭推
那知中道遇摧折鵲鷄原上徒傷悲中情感激為君賦
才薄愧乏瓊瑤詞

題梅花卷為顧御史賦

我家家在吳山住路入梅花最深處天空歲晚雪紛飛
繞屋寒香千萬樹花時日日醉花邊酒醒長吟花下眠
聽到翠禽啼欲斷任教明月照青天自從遊宦京華久

夢遶花前與花後故山花發想依然何遜才華已非舊
霜臺御史繡衣人藏得橫斜水面真一幅齊紈裁皎雪
筆端渾是玉精神蕭齋凍雨簷花落紙帳夜寒燈影
薄恍然相對似還家春信依稀生綠萼綠萼春生日漸
多故山歸計尚蹉跎玉堂日賜宮壺酒其耐梅花似雪
何何當便赴看花約莫待江天吹曉角詩成却向畫中題
酒熟空思花下酌

烏臺清曉

廣寒宮闕金風起十二瓊臺涼似水何時窻月弄晴輝
冷浸栢臺秋色裏美人繡衣對青燈六曲雲屏爽氣凝
南飛烏鵲不驚繞玉壺清貯銀河冰此時心在澄虛境
白露紅蓮秋炯炯忽聞禁漏滴三更喚起遐思發深省
參橫斗轉天蒼蒼將整冠珮朝明光衮衣無缺不煩補
近臣何事諫封章城烏未啼人尚悄坐待金爐香篆裊
天上初傳啓九關一庭霜月烏臺曉

題雲山圖

三山陳翁湖海士平生浩蕩懷奇氣晚年脫迹遊永嘉
寫盡江南山水意江南山水何處多吳頭楚尾青差幾
天鷄啼罷海光動大江一道懸銀河江村綠樹人家曉
燕子歸時人悄悄千山空翠挾雨來萬頃白雲閑不掃
雨不見米芾顛海岳廟前書畫舫溪藤出水雪花皎興
來搖筆生雲烟又不見高尚書家住房山滄海隅畫長
坐對遼天迴尺素亂洒雲模糊陳翁昔歲得其真邱壑
蟠胸奪天造大娘劍器張顛草手應心通入神妙何當

放浪遊名山倒跨白鹿尋仙關翁乎翁乎精爽可呼起
笑折三秀雲崖間

春風堂

昔年有士遊程門彌月坐絕春風溫清芬相傳數百載
族姓喜見雲初孫早年負笈登太學宰邑佐郡多承恩
公餘退食高堂下右史左圖供討論大書春風揭華扁
仰止先哲今如存恍然心目若親炙不異當時和氣暄
我聞游揚嘗立雪太山巖巖師道尊大賢設教豈矛盾

萬善殊途同一源吁嗟道喪向千載古聖與義多湮淪
斯文未泯出天意篤生河南弟與昆立德示矜式
垂訓萬世開蒙昏猶如長夜方未曉朝陽忽起光燉燉
春風堂中春寂寂之子獨坐無煩喧更歌浴沂詠歸罷
俯視滿庭芳草蕃悠然真趣非外假欲寫心素應忘言

南湖佳趣

雨香雲暖東風裏綠漲南湖湖上水望中千頃淨無塵
細縠平鋪吹不起鳬鷺鸕鶿交交飛蒲芽含鰖蘆芽肥

天光水影更蕩漾湖南湖北皆春暉美人家並湖邊住
花落花開春幾度自從捧檄仕京華夢遶烟霞釣遊處
我本沙鷗社裡人別來頻見鳳城春賦詩為寫湖南趣
猶憶汀洲采白蘋

陌上桑

東城璧日曙煌煌流照秦家文杏梁羅敷初起鬱金床
粧成曳履出蘭堂纖纖柔荑攜玉筐遂伴紫陌采綠桑
陌上麗景正春陽鮮華豐草競紛芳暎見羅敷好容粧

丹唇含貝眉黛長瓠犀皓齒粲晨霜臉邊勻飾和頰黃
宮腰冉冉盈把強澄瀾娟娟溢嬌睚倭墮寶髻低復昂
翠釵翩翩翹鳳凰耳畔明月綴雙璫廣衣窄襦巧束裝
鮫綃方領湘綺褱綉文交頸刺鴛鴦合歡緩帶順風颺
迴軀竦步婉欲翔落英飛燕交頡頏行人辟易立兩行
盡訝羅敷艷非常使君五馬來東方遣吏借問家何鄉
願言授綏共徜徉羅敷含羞佇道旁湏臾微微啓鶯吭
致辭向前請審詳妾家易識復難忘青樓畫閣儼相望

二八辭親奉姑璋良人初并侍中郎朝朝馳驟少年場
騶驪銀勒紫絲韁芙蓉劍轉七星芒今年專城綰金章
瑤璫結珮響鏘鏘真珠颯纚垂香囊府中出入善趨蹌
六衢三市生輝光可憐意氣能驕張還家別有歡無央
九華帳列東西廂侍女齊熏蘇合香箏竽喧闐笙簧
七盤曲赴紛浩倡左右起舞茱萸裳襜褕綺態遊龍驤
中庖豐膳進牛羊佳醴湛湛泛華觴良人欣欣方樂康
羅敷辭竟聲彌揚置筐再拜申禮防人生伉儷各有當

使君一向不自量蠶餓妾欲歸洞房五馬勿復久彷徨
題江山傑閣圖

我生不識黃鶴樓未向滕王閣上遊南昌武昌空夢想
安得醉倚雕欄秋畫中樓閣知何處我欲凌風試飛去
西山雨挾南浦雲鸚鵡洲連漢陽樹手招仙人王子喬
吹笙歸來共逍遙緱山綵鳳綽難見華落瑤池玉母桃
人生百歲真如寄何乃長年苦匏繫流光一去豈復來
須趁青春尋賞事楚江迢迢帶楚山危樓傑閣江山間

飄然乘興窮躋攀何須鎔鍊大藥延紅顏

聽鶴軒

黃鶴樓頭鶴飛去遼東白鶴知何處何如結屋鳳城西
坐聽鶴聲來玉宇玉宇澄清玉鏡明戛然孤響落青冥
天風吹入松窓底半夜秋生四座聲窓中美人雲霄士
素被香綃寒熟睡驚迴一枕小遊仙恍在丹山璚島裡
丹山璚島綵雲深山中珠樹森成林珠林花開不知數
花開處處皆仙禽何當飛弄瀛洲月聽取長鳴山石裂

歸來一笑蟠桃春赤壁橫江何足說

題赤城霞氣卷

赤城差我倚天起橫絕海雲三百里嵐霏銷盡霽霞明
綵翠蕩搖青鏡裏綺華丹靨紛交流五色芙蓉綠水秋
羅浮天姥何足數氣壓三山十二樓粉署仙郎赤城客
石梁華頂親遊歷幾迴夢入故山霞不知身在長安陌
長安陌上早朝天日麗觚觥曙景鮮紫蓋黃旗蔚蔥蒨
龍光咫尺五雲邊鵷班侍立敷章奏花露沾衣凝竚久

恍疑身上青雲梯
仰手瑤光攀北斗
羨子朱顏綠鬢時
清朝際遇古來稀
早竭丹心報明主
赤城歲晚弄霞暉
贈鶴林周玄初

鶴林先生紫烟客
丰神秀朗雙瞳碧
早年學道逃人羣
吳越名山遍遊歷
靜中默悟天地真
却歸高臥桃花春
河車姹女未騰化
滄溟回首揚紅塵
丹書召入麒麟殿
身被羽衣承燕見
從此聲華傾上都
五侯七貴爭迎餞
西方神嶽高崢嶸
詔遣先生祠百靈
道傍奔走二十石

人訝真仙降玉京禮成俯伏拜天庭珮環拂地風泠泠
四門闕開對黃道五雲回綵垂金城是時君王方穆清
龍顏顧盼喜氣生賜以石髓所和之太羹賈生前席何
足榮罷朝上疏陳悃誠臣願乞身終素情綸音重降笑
蓉闕特許先生返巖穴路出龍盤山外雲帆開揚子江
心月青鸞白鳳飛參差仙之子兮繽紛而相隨洞天冥
冥兮千秋一時先生歸去兮猶未遲丹臺舊種金光草
此際花葉方紛披懸知先生交構功已成欲將身與元

化并長生之術倘可授我願相從閨苑行

湘竹簫歌為趙丹林賦

君家洞簫天下奇碎紅亂點香淋漓濃如丹砂沁冰肌
淡似猩血凝瑤枝持來世人莫能識疑是秦王女兒之
所貽幾回吹向霜江曉皓月不明風悄悄一聲卷入碧
雲中驚散飛鴻落天表君不見重華去兮歸路遙二女
泣向湘江皋江皋之竹竹間泪萬古千年長不消我將
挾君攜此同上黃鶴樓醉弄一曲離鸞秋曲終飛度洞

庭去試聽蒼梧猿夜愁

題扇和張文伯韻

洞庭綠漲波連天
蒹葭露冷秋蒼然
酒船橫放白鷗渚
世間誰謂無神仙
百年總是邯鄲客
豈必區區困形迹
揚雄識字竟何成
賈傅抱才曾受謫
公生明世登天門
日侍彤庭近五雲
平生本有江海趣
長憶五湖沙鳥羣
夢中濯纓歌未了
藥爐九轉神丹早
待公白首報君恩
同采靈芝向瑤島

樂親堂

美人結珮朝明光俯伏丹陛陳封章
高堂親老乞就養恩賜儒官歸故鄉
潮州南去幾千里原田每每帶桑梓
到家開講多閒時日日陞堂奉甘旨
山梁雉聲鳴角角人生無如養親樂

溪南小隱為孫叔瑜賦

我從天上歸烟霞偶過溪南小隱家
谿頭昨夜雨新歇浦口水生浮釣槎
十年江海狂游跡暫爾還鄉反如客

沙鷗野鳥忽相逢總是當年舊曾識明朝又欲去朝天
身在龍樓鳳閣邊回首溪南何處是夜深夢落洞庭船
東坡畫竹為周仲輝題

眉山一代稱文雄落筆往往凌長虹時將書法作畫法
墨花洒出皆神工一枝老幹欺霜雪數葉脩脩更清絕
儼如端笏立朝時餘子紛紛莫能折至今看畫精爽生
恍疑玉局攀雲輶詩成拜寫發長歎南山一帶橫空青

題竹根道人

早年曾作長安客遊遍東城與南陌老來却秉歲寒心
情與竹君相莫逆平生遇竹成久留不異當年王子猷
詞人為作竹根傳飽食渭川千畝秋邇來歸臥吳山久
白髮蕭蕭心不朽興酣按節竹間歌却笑吳興饒太守

白雲窩

君家昔在吳山住俗客長年少來去我因登眺遠相尋
直到白雲最深處憐君所寓多清幽雲為臺榭雪為樓
但解此身居混沌不知人世換春秋采藥雲隨身讀易

雲依座閒到白雲吟醉擁白雲臥石鼎茶香午夢回白
雲猶自未曾開柳絮一天風不卷梨花萬樹月初來莫
論柳絮風難比梨花月容易飄零容易缺何如白白山
中雲晨夕相看自怡悅自怡悅人誰知白雲本與無心
期飄然辭雲下山去佩琴攜鶴遊京師寄迹京師逾十
載白雲縹緲長不改濟人未了竟忘歸故山猿鶴應相
待我去君來二十春今朝即復又逢君何時共買東風
棹相與還山訪白雲

春曉美人圖

梨花球上鷄鳴早十二瑤樓天乍曉東風不動綠楊絲
雲母窻空春悄悄銀屏複帳掩鮫綃遮斷蓬山海路遙
鬢亂釵橫雙鳳嬋玻璃枕上不勝嬌誰將鸚鵡偷調弄
驚散瑤臺合歡夢金盤仙掌日華高小苑花枝露痕重
小玉薰殘蘇合香臨鸞先學理新粧合歡欲起愁無力
滿院綠陰春晝長

送人還江西

清江水浸芙蓉花君來別我將還家知君家在臨川住
十載從宦遊京華職居宗正掌清近親見玉牒滋仙葩
聖恩如天浩無際特賜休老尋烟霞都門祖餞擁冠蓋
有琴在囊書在車到家山水想依舊西風落木秋更佳
曉窻一枕夢初破忘却廳鼓趨晨衙山田霜降稻新刈
晴溪水涸魚堪叉陶然醉卧菊籬下人生此樂真無涯
二疏榮歸難獨美朝野歎羨良非誇慚余未遂報明主
敢憶五湖乘釣槎賦詩贈君西別去側身東望空長嗟

題山水小景

往年曾到西湖曲雨後西山翠新沐蘇公堤上柳枝青
蘇小門前芳草綠畫船搖曳向湖中載得鴛鴦浦口風
春去春來知幾度總將心事付殘紅客窻見畫成今昔
湖水湖山渾咫尺何當重費買花錢載酒六橋尋故迹
題周昉折花仕女圖為劉士賓賦

陽臺雨過朝慵起翠撒雲鬟倦粧洗東君昨夜送韶光
春在花枝嬌旖旎暖香暗襲紅霞綃沁入玉纖溫不消

麝臍龍腦避芳馥金鴨沈檀皆罷燒含情欲與花神說
為訴芳心愁萬結莫教零落五更風蝶粉蜂黃共消歇

贈道士吳玄覽

鶴齋先生鶴上仙與余曾逢東海邊手持崑岡綠玉杖
袖有金匱青霞編謂余不是紅塵客前度名當在仙籍
夜闌抵掌論長生笑指東方曉光白爾後飄然各解分
茫茫回首不相聞先生遍遊五嶽去余亦還山臥白雲
此來忽遇吳貞節昔事先生受真訣借問先生今在不

太清之上朝仙闕仙闕深沈隔九關珠樓瑤宇倚高寒
中有仙人不知數月為環珮雲為冠蟠桃花發春漫漫
人世千年如等閒我將滅迹棲名山交構精魄營神丹
天傾而後凋朱顏坐視桑田成海湏臾間

題澄江韓氏彌性堂卷

芙蓉城裏花如簇況有澄江秋水綠花間茅屋是君家
門外縈迴江一曲長年自與世情疎何異柴桑處士居
竹粉晴飄圓罷局芸香晝染讀殘書我曾放迹澄江上

水墅山邨遍遊賞如何未解識君家往事茫茫空悵快
君家令子仙闈郎我忝濡毫直玉堂侍宴每聯金屋坐
退朝常接玉墀行幾番論舊相留戀彷彿澄江眼中見
令人飛夢落江南滿座秋光淨如練披圖索我為題詩
老去空慚藻思非勉率為君歌此曲恍然疑接謝元暉

題烟江疊嶂圖

劒關平削千山開勢掩巴蜀何雄哉蛟飛鳳舞互爭秀
中有一道長江來昔年鼎足曾分峙慘淡風雲屯伯氣

鄧艾功勲誇一時武侯忠義垂千世只今天地皆清寧
蜀江水綠山青青漁舟一葉三峽口行人醺酒登夷陵
我生蹤跡留南國未遂西遊到荆益何當鼓棹泝瞿塘
錦官城裏看山色

為侯主簿題羣玉軒

使君自是玉雪姿出宰百里逢清時手栽江梅遶公館
天寒歲晚花盈枝我從天上歸林谷索我揮毫賦羣玉
何郎才思已非前空憶揚州夢難續親記承恩從翠華

頻過小苑曉看花
玉堂雪霽東風冷
千樹瑤瑤發素葩
宮壺酒醒踈鐘起
身在蓬萊仙島裡
旋卷青綾披素裘
筆端詩成如振綺
披圖便欲賦長歌
撫卷其如羣玉何
憑誰喚取雙青鳥
聽我吟翻瀚海波

孟母斷機圖為練母沈夫人壽

匹緜不易成
紛緒不易治
如何孟氏母
剪斷機中絲
機中絲斷猶可理
覆簣成山寧可止
子賢著德炳日星
母教垂名耀青史
練墳伯仲純孝資
蚤年英拔非凡兒
趨

庭既承嚴父訓慈闈化導猶孜孜隆冬盛暑功弗間燈
憲常聽烏翻枝突然已弁思報德寸草難答三春暉千
年桃實瑤池後酒進三觴樂初奏手持孟母斷機圖拜
向親前祝親壽雙親鶴髮皓垂肩蘭玉參差爭秀妍自
言兒雖匪敢窺前哲母氏特比孟母賢兒容既婉母顏
悅庭戶藹藹春風邊我聞百行孝居首頃孝於今信希
有袖懷三橘奉親嘗臥獲雙魚適親口豈如此親古賢
母墳也愛親心更厚獨憐綵衣遊未歸王孫芳草幾萋

其版輿每御高堂上空對畫圖思見兒庭前幸有孫枝
茂買肉食之須此時會待陳情能奉表我當重賦斷機
詩

題王仲遠東郭草堂

百花洲上花全落綠水逶迤帶烟郭郭東茅舍是君家
千頃湖光秋寂寞長年無事揜閒扉欲遠人間是與非
西望吳時舊臺榭綺羅空逐綵雲飛白蘋波上涼風起
菰米炊香蓴菜美沿月乘流幾忘還釣船橫放蘆花裡

知君與世漸忘情不羨金門大隱名我欲敲門一相訪
滄浪同泛濯塵纓

風竹二首

此君曾向瑣闌看金莖露洗青琅玕故山近日重相對
涼雨新收香粉墜一枝瀟洒畫圖中寫得江南葉葉風
明朝何處重相遇數閣深沈翠霧籠宣和內家稱畫竹
文蘇響斷誰能續後有房山與荊邱筆端寫盡瀟湘玉
君家此本屬何人一竿獨立淇川麓凜然節操凌冰霜

歲晚佳人在空谷天寒彩鳳不來棲日暮煩誰伴貞獨
題謝孔昭畫天池石壁

層峯秀拔秋雲端疊石亂鎖青巒岼土花半削太古色
碧池蕩漾清流寒中吳勝境當第一虎阜靈巖本非敵
惜哉未經常白題數百年來閱奇迹我家相去十里餘
春遊秋賞無時虛廬山天姥著名久當與伯仲稱輿圖
東山遺裔丹青客海內仙蹤在胃臆興來落筆妙入神
滿紙縱橫列泉石誰能為我喚取五湖船一夜飛度宮

金史四
卷二
隆顛仰窺天闕叩石鼓驚起萬壑松風泉

林霏軒

憶昔放舟苕霅間青鞋竹杖登弁山春日霽曉光薄
巫女綠濕雙螺鬟深林無處覓僧寺衣上紛紛帶空翠
却尋樵路到樵家彷彿瀟湘問山市十年高臥吳山秋
每看烟霏散復收東南佳趣滿曾臆人生何必窮仙遊
自從候曙朝金殿天上神仙幾親見龍樓鳳閣綵雲中
紫蓋黃旗蔚蒼蒨山人忽寄林霏圖軒居冷蔭青扶踈

層陰濃黛數千頃清潤逼簾秋氣虛翻然便欲動幽興
獨抱瑤琴訪蘿逕同是烟霞社裏人相逢不必通名姓
時清未敢歸林巒吳弁羣山空畫翰滿目晴光春欲染
緘詩先和松風寒

雲門山水圖

我昔探禹穴嘗登秦望山白雲橫秀色半落青巔岼山
高雲深縹緲空曠勢拔海天山萬丈赤城霞氣石梁虹昏
旦網緼各殊狀便欲因之上天台飛度弱水登蓬萊笑

蓉削出海光裏綠波蕩漾金銀臺山重重兮蒼翠雲溶
溶兮昭回素娥玉童兩兩追隨翠鸞紫鳳雙雙徘徊丹
崖碧磴懸寥廓我將從之路綿邈翩然興盡思歸來至
今猶憶仙家樂秋風葉落春花飛俯仰清遊今是非美
人示我綠素軸頓覺滿目生清輝山青雲白宛如昨賀
家宅臨湖水涓日長草閣門不掩有客放舟來問奇自
從金閨預通籍曉振珂珮趨彤墀公堂退食時展玩清
夢幾度生耶溪嗟予謬陪青瑣闥與子出處同襟期雲

山本有平生趣顧余菲質叨恩私寸心報國倘能遂却
跨白鹿登丹梯

題金山寺

長江萬里從西來直走東海何雄哉金山湧出浪花裏
近對北固青崔嵬我嘗放舟京口宿擬叩山門快遐矚
平明潮漲催解維水影山光空滿目住山開士江海人
卓錫棲禪今幾春邇來膺召遊上國校讐祕閣從詞臣
退朝迎我維摩室手啓琅函展湘帙青宮少師希世才

滿紙縱橫揮綵筆恍然置我金銀宮
墨華亂落江天風
妙高臺上月輪轉海門日照扶桑紅
便欲因之訪三島
側身飛度東溟曉三山弱水一杯中
俯瞰齊州拳石小
自慙凡骨非仙姿江山咫尺成天涯
飄纓忝入青瑣闥
書長獨坐勞相思何當洒翰巉巖壁
剝蘚題名紀遊歷
狂歌起喚騎鯨仙我亦瀛波釣鰲客

題神駿圖

侯家捱上拳毛騮奇紋五色明
春霞天生神駿異凡骨

不數霍家獅子花昔年初出秦川道飽食秦原漢陵早
昂頭振鬣一長鳴驚散秋鴻落天表曾隨博戰雪山西
南海霜風入玉蹄劍外已銷狐兔跡歸來穩步上沙堤
雕鞍金勒青絲轡頻從長楊獵迴騎嬌嘶紫陌軟塵輕
弄影鳳城春日麗侯家勲業比山河萬古春永不磨
通藉金門青瑣裡常騎神駿振鳴珂

貞節堂

良人死作戰場鬼賴有兩兒猶可倚抱兒啼泣背燈光

遊魂不歸秋夜長當時羅衾香未滅綉幃亦有鴛鴦結
婦人無夫若風燭縱欲重施為誰設兒今成人妾守志
太守封章旌節義良人精爽亦有知妾身雖亡復何愧

題

闕

隋家二世厭袞衣不御丹宸朝華夷汴水東流三百里
行宮夾道花離離交刀剪落鴛鴦綺高展牙樯照江水
承恩侍從千蛾眉深鎖洞房嬌不起九華帳裏醉濃香
回首烽烟暗晉陽花月歌闌花落盡空城秋雨青蕪荒


題邱園舊隱圖

亞卿昔作桐江客擬向邱園終隱迹
嚴陵灘上富春山
烟水林泉已成癖
中天午夜客星明
遂別雲蘿謁武京
玉殿含香頻入奏
仙闈視草久題名
承恩出贊滇陽治
萬里山川歸攬轡
千重鳥道入雲端
一派江流落天際
却思高臥在家鄉
小檻閒窓六月涼
明月到時松影轉
晚風生處藕花香
知君已受西南托
莫戀東州舊行樂
須待功成報聖明
濯纓重問滄浪約

題畫

春林一雨花成泥，萬絲深處殘鶯啼。
舍南舍北水漲溪，出門有馬不可騎。
千巖萬壑烟霧迷，近山一帶橫峨眉。
須臾開霽朝日晞，青嶂突出臨溪湄。
宛如故舊久別離，邂逅忽見皆忘機。
長松脩竹交凝暉，空翠藹藹濕不飛。
蘿窻寥寥春晝遲，蕙帳夢熟眠多時。
北山有文寧用移，買山豈假襄陽貲。
客來莫怪衡門低，并訝花徑深逶迤。
芊芊芳草剪碧齊，自是轍迹長年稀。
畫中人物知為誰。

高尚當出晉義熙抱琴載酒將安之飄然不受塵鞅縻
我辭漁釣遊京師秋風卷空舊茅茨五湖買艇復奚疑
行須早聽關門鷄返懷榮沾雨露私青鞵徒憶尋山蹊
林泉故人倘念我它年別訂瑤華期



青城山人集卷二